

Newspaper	UTUSAN MALAYSIA
Date	24 APRIL 2015

## Elak pertembungan kuasa tentera di wilayah bertindih

Um-24/4/2015

PUTRAJAYA 23 April - Malaysia menegaskan pihak-pihak yang terlibat dalam tuntutan bertindih wilayah maritim di Laut China Selatan haruslah mengelak daripada menggunakan kuasa masing-masing supaya tidak berlaku apa-apa insiden pertembungan ketenteraan di perairan itu.

Perdana Menteri, Datuk Seri Najib Tun Razak berkata, memandangkan tuntutan bertindih itu adalah isu yang sangat kompleks dan sensitif, ia perlu ditangani secara berhemah berlandaskan prinsip perundingan dan amalan undang-undang antarabangsa.

"Antaranya kita mesti lakukan perundingan tanpa menggunakan kuasa, tanpa membenarkan ketegangan ataupun apa-apa taktik seperti tekanan kepada negara-negara kecil," kata Najib semasa temu bual bersama pengarang-pengarang Pertubuhan Berita Nasional Malaysia (Bernama) menjelang

Sidang Kemuncak ASEAN Ke-26 di Kuala Lumpur dan Langkawi pada 26 dan 27 April ini.

Perebutan wilayah maritim itu membabitkan Brunei Darussalam, Filipina, Malaysia dan Vietnam selain China dan Taiwan adalah antara isu berlanjutan yang dijangka dibangkitkan dalam sidang kemuncak kali ini.

"Saya tak boleh menahkan memang ada perbezaan pendapat dan mungkin juga dari segi bilateral wujud sedikit sebanyak ketegangan, namun secara umumnya ia masih boleh kita kawal dan boleh kita uruskan dalam konteks ASEAN sehingga satu bentuk penyelesaian dicapai," kata Najib.

Najib juga menegaskan Deklarasi Tatalaku yang dipersetujui pada 2002 harus diterjemahkan kepada Kod Tatalaku sebagai panduan semua pihak dalam hubungan harian bagi mengelak pergeseran di kawasan berkenaan.

Namun setakat ini, belum ada permuafakatan berhubung Kod Tatalaku yang harus dipatuhi oleh negara-negara terlibat.

Sebelum ini dilaporkan draf kod tatalaku tersebut antaranya mencadangkan panduan latihan ketenteraan dan cara mengelak kemalangan di perairan itu.

Selain itu, Najib berkata adalah penting usaha penyelesaian berdasarkan undang-undang seperti *United Nations Convention on the Law of the Sea* (UNCLOS) yang menjadi prinsip penyelesaian apa-apa tuntutan, berasaskan pematuhan undang-undang.

"Mana-mana soal tuntutan wilayah antara dua negara secara bilateral adalah sememangnya kompleks, apatah lagi yang bersifat multilateral melibatkan beberapa negara... Tentu sekali ia menjadi lebih kompleks dan multidimensional kata perdana menteri. - **BERNAMA**